

Mchungaji Ambaye ni Mungu

Nami nitaweka mchungaji mmoja juu yao, naye atawalisha ... naye atakwira mchungaji wao—Ezekieli 34:23.

Yesu alipata fursa ya kufikia akili za wasikilizaji Wake kupitia kwa njia ya mahusiano wanayoyafahamu. Aliufananisha mvuto wa Roho na maji ya baridi yaburudishayo. Alikwisha kujifananisha Yeye mwenyewe na nuru, chanzo cha uzima na furaha kwa viumbe asili na kwa tuwanadamu. Sasa katika mfano mzuri wa kichungaji anaonesha uhusiano Wake na wale wanaomwamini. Hakuna mfano uliojulikana kwa wasikilizaji wake zaidi ya huu, na maneno ya Kristo yaliunganisha pamoja na Yeye mwenyewe milele. Wanafunzi hawakuangalia tena wachungaji wakichunga makundi yao bila kukumbuka somo hili la Mwokozi. Wangeliweza kumwona Kristo ndani ya kila mchungaji mwaminifu. Waliweza kujiona kwa wenyewe kama kondoo wasiojiweza na walio tegemezi.

Kielelezo hiki nabii Isaya alikuwa amekitumia kwa kazi ya Masihi, kwa maneno yanayofariji, "... Atalisha kundi lake kama mchungaji, Atawakusanya wana-kondoo mikononi mwake; Na kuwachukua kifua ni mwake" (Isaya 40:11). Daudi aliimba, "Bwana ndiye mchungaji wangu; sitapungukiwa na kitu." Zaburi 23:1. Na Roho Mtakatifu kupitia kwa Ezekieli alitangaza: "Nami nitaweka mchungaji mmoja juu yao, naye atawalisha." "Nami nitawatafuta waliopotea, nitawarudisha waliofukuzwa nitawafunga waliovunjika, nitawatia nguvu wagonjwa" "Nami nitafanya agano la amani nao." "Hawatakuwa mateka ya makafiri tena; ... bali watakaa salama salimini, wala hapana mtu atakayewatia hofu" (Ezekieli 34:23, 16, 25, 28)....

Kristo ndiye mlango wa zizi la Mungu. Kupitia mlango huu, watoto Wake wote, tangu nyakati za awali kabisa wamepata haki ya kuingia. Katika Yesu, kama ilivyooneshwa kwenye mifano, kama ilivyoashiriwa kwenye ishara, kama ilivyodhihirishwa kwenye ufunuo wa manabii, kama ilivyofunuliwa katika mafundisho yaliyotolewa kwa wanafunzi Wake, na katika miujiza aliyoifanya kwa wanadamu, walimwona "Mwana-kondoo wa Mungu aichukuaye dhambi ya ulimwengu" (Yohana 1:29), na kupitia Kwake, wanaletwa katika zizi la neema Yake. Wengi wamekuja wakileta vitu vingine kama lengo la imani ya dunia; taratibu na mifumo imewekwa ambayo kwayo wanadamu wanatumaini kuhesabiwa haki na kupewa amani na Mungu, na hivyo kupata njia ya kuingia kwenye kundi Lake. Lakini mlango pekee ni Kristo, na wote ambao wameingiza kitu kingine kuchukua nafasi ya Kristo, wote ambao wamejaribu kuingia katika kundi kwa namna moja au nyingine, ni wezi na wanyang'anyi....

"Aingiaye mlango ni mchungaji wa kondoo." Kristo ni mlango pia ni mchungaji. Anaingia kupitia kwa Yeye Mwenyewe. Ni kupitia kafara yake ndipo anakuwa mchungaji wa kondoo (**Tumaini, seh. ya 2, uk. 89 – 92**).